

棄書

棄書

翹勳軒叢稿之一

開縣彭作楨撰

荀彧勸曹操圖劉備郭嘉諫止之論

以下光緒廿九年癸卯
二小時完卷

荀彧郭嘉於劉備或殺或否其謀雖異而爲曹操之心則同或者謂備此時窘迫窮蹙操殄之直反手間耳無嘉言備其能離虎口乎是嘉果有輔漢之心而非專爲操爪牙視彧之誅鋤豪傑務尊主權不可同日語矣呼爲此說者眞爲嘉所欺也嘉初事操大喜曰眞吾主是時獻帝雖庸懦固天下之共主也而嘉謂操爲主居心尙可問乎其策備也亦謂備終無成耳豈料其取荊益連江東大爲曹氏梗哉故其言曰備以窮歸而害之則智士將自疑所謂智士嘉自況也嘉與彧等皆先事他人而後改圖無非欲操挾天子以令諸侯馴移漢祚已亦得建不世之偉烈然恐一二人不能成事也故每欲賢才輻輳共贊大業豈眞以漢室爲念哉備有英雄名投公孫附呂布已而歸許亦猶彧嘉夙昔之靡

依耳一旦殺之凡智士之欲事備者皆裹足不肯前嘉欲附以成名之意不幾成畫餅乎然則嘉之定計蓋較或尤密也

范增論 二小時

東坡譏范增不能去是矣至謂增不去項羽不亡因許增爲人傑則大謬古云萬人爲傑漢高帝謂蕭何張良韓信皆人傑至昭烈定蜀魏博士傅幹亦稱諸葛關羽張飛爲人傑果何由而得此美稱哉曰擇主羸秦失馭四海鼎沸高帝起草野無隻民塊土以爲階而三人附之其具特識已如此若關張從昭烈於流離之際諸葛輔昭烈於敗衄之餘奮其忠義卒成大業袁氏謂賢於漢初三傑無他知昭烈可與有爲也增素稱號奇計者獨不知羽之爲人乎羽暗噫叱咤不能任用賢將故信委之而去而增必欲輔之保羽之能聽從乎保羽之終不致疑乎考羽生平無深謀奇策易於信亦易於疑高帝見迫樊噲數語而卽釋太公被繫項伯一言而生歸至陳平定殷浸假而欲誅之矣黥布稱病不撫

緩而反怒矣平譏其意忌信讒允哉增委質事之言不聽計不從即使其終不去或更如增者十以輔之羽亦未有不亡者何東坡之未審也卽高帝不用蕭張韓之謀能履至尊而臨億兆乎昭烈不用諸葛策能與孫曹相抗乎有以知其必不然矣故吾謂羽者浮躁淺露人也而增更昧於擇主使其早識高帝傾心事焉其勲業未必在三傑下乃不自重其身謬謂羽可定大事卒至身死而功未就惜矣而東坡乃許爲人傑烏可信哉烏可信哉

黨錮之禍起於房周賓客論

嗚呼黨錮爲千古未有之奇禍推原禍始豈非房植所致哉植與周福之賓客各護其主妄分清濁使甘陵分南北部植久知之知之而不禁之賓客益放心而議之彼福者吾無責焉耳持祿保位聲聞閭寂宜其無特識也獨惜磊落如植亦貪一時之虛名而釀朝廷之鉅患涓涓不已將成江河信哉或謂偶爾譏評馴致黨禍豈植所預料吾謂植而非賢者則已植而賢固宜靜默淵懿不露

圭稜處濁世而身震京邑未有不顛蹶者也植負大名邇其生平乃無一足稱中官擅柄牴牾者朱穆挫折者李膺誅其爪牙者成瑨成瑨案其殘黨者翟超黃浮而植則否海宇未靖魏朗殄九真蠻度尙滅桂林賊馮琨應奉平荊州張奐段熲殲羌寇而植則否然則植何聲稱赫赫乎吾意其人工弋譽而短幹濟如胡廣之儔耳植立朝最早三君俊顧及廚互相稱美未必非踵植之風也惟其志在釣名故賓客羣揄揚以中其意而豈料禍之至此極哉然申屠蟠一隱士猶能預燭將來超然物外植顧縱賓客之肆議而漠不爲意兩相比核其賢否不待辨而自明矣

行己有恥使於四方不辱君命可謂士矣義

當強鄰鷹瞵之秋使臣承綸音而修好見其器械犀利軌政脩明商賈殷闐農業勃發學校盛則童穉亦解愛君教育薄則巾幗亦崇實業心慴者久之一旦與驕主對語蹙起其足驚愕其容任彼國之爭權奪利亦守雌而不敢校噫士

品隳矣如大局何當軸知曲諱者之不足託大事也始喁喁然設專門羅英俊而學子亦務爲開通以期副皇華之選幾若脩己可不至而交涉斷必講者嗚呼履正清平貞高絕俗有大節之佳士史臣且掄揚不已顧可犖然恣肆哉此風一倡吾恐禮義廉恥昔稱爲四維者今且奔軼而出矣名教大防先儒極力扶植者今且詆其迂闊矣狙獐末流售適臣之謬說保傭賤侶仿敵國之衣冠破壞藩籬甘爲鷹隼胥原無恥陵夷以至于斯也夫子立言爲萬世防流弊卽爲及門勵清修不然通達如端木豈不能折衝樽俎而夫子言之不適形其贅乎子之意蓋謂使才固足重而檢身尤爲先務耳此與告原思問恥同一着重首句後儒謂端木工吐詞未盡使之能故夫子進之此說非也吾觀端木駟結騎連庭見列辟俱足動其歆慕誰謂才非素裕乎惟是立功名之士或負俗累倘不預加陶鎔恐踰閑蕩檢反爲吾道羞自古謚天下者材壞天下者亦才可不懼哉蘧伯玉恥獨爲君子端木則悅與不若己者處士不恥惡衣端木則肥

馬輕裘以自耀君子恥其言端本則蒙多言之譏爲機變之巧者無所用恥端本則開戰國策士之風邦無道而富貴可恥端本則務貨殖宰信陽歷稽夙昔疵類不尠未始非務造通才貽之咎也國僑恭以行己有子曰恭近于禮遠恥辱也觀僑辭邑見許同僚爲善必推先達肅然可欽自不致赧然蒙垢由學問而發爲經濟迥非諸卿所可及至隨孱弱之君入虎狼之國論辨泉湧不稍蜷伏尤其餘事也吾嘗謂有守譬之羈勒有爲譬之馳驅棄羈勒而徒尙馳驅不敗事者幾希彼急欲鑄才而遺躬脩眞眉睫之見哉故子答端本鄭重曰行己有恥因連及曰使于四方不辱君命而許之曰可謂士矣

其二

孟子曰人不可以無恥又曰不恥不若人何若人有此士之極軌也士值國勢阡危之際凡兵戎財賦政治刑禁學校農桑工藝諸大端咸相形見絀猶不知積愧生奮力圖富強而崇宗老氏之守雌儉安目前頑鈍無恥因而出使列邦

亦虛與委蛇不敢保固有之權利損威喪重至此極矣欲救其弊斷自有恥始或謂此乃國家要圖未可獨責之士不知保天下者匹夫雖賤與有責焉嘗見教育發達之邦其黎庶識國家與已關繫之理基礎稍圯羣扶持不遺餘力藐爾婦孺亦引危亡爲警惕以故人才踵接國恥可雪區區講信脩睦尤餘事也彼儼然士也者顧苟且成風而不知羞惡奚可哉曰己者明責無旁貸也曰行己者明此中自有作爲也或又謂聖人所云有恥祇如伊尹之不爲非道非義若恥及國衰恐非立言本意不知軌出範圍恥之小者也國力絀薄恥之大者也蓋儒生遠辱以辭受取與揖讓進退爲初基極而至于脩己治人天下國家之大至足歷諸國囁囁召侮士引以爲恥必講外交學以濟之更不待言矣或又謂春秋重邦交而端木又能言此節宏愷端在不辱君命後世名儒輩出于綱常名教之大防推闡無遺而抗志敵廷正襟侃侃者歷朝僅數人焉于此見脩士易得而烈士難覩也不知士之闖茸者由于隱忍士之慷慨者由于激厲

世焉有忠義之氣未作而可圖國是者乎故有恥本也體也重也不辱末也用也輕也吾意斯時魯國微弱見挫強鄰而羣臣泄沓成風罔知遠恥昭公如楚何怪孟僖子失禮耶聖人觀之憤恚特甚其告魯君以知恥誠欲其困知勉行與庶務以絕覬覦也則有恥不辱可謂士亦猶是告魯君之意也夫

今有璞玉於此雖萬鎰必使玉人雕琢之義

以下光緒卅年甲辰
住開縣中西學堂作

昔孟子告齊宣王曰今有璞玉於此雖萬鎰必使玉人雕琢之趙邠卿注曰玉雖有萬鎰之衆多必須玉人能治之吾滋疑焉璞玉之未治者荆山有璞卞和抱而泣楚子命玉人治之竟獲美玉後歸趙秦王欲易以十五城一時諸侯莫不羨慕焉孟子所謂璞玉疑卽指此若周之砥礪梁之懸藜楚之白珩縱見重於廊廟未震驚於鄰封孟子必不取喻也以無瑕之璧謂有萬鎰之衆多其誰信之後儒謂璞玉價值萬鎰金較確攷古載籍仲子奉聶政黃金百鎰趙資蘇秦黃金萬鎰蘇代請獻辯士千鎰衛君以三百鎰隨犀首使者蒲守効胡衍金

三百鎰宋饋孟子七十鎰薛饋五十鎰咸指金言未有曰良玉萬鎰者夫希世之珍人恒摩挲不釋手謂是物也何若是之溫潤也然而太璞自完精英飽聚禮賓客而陳之不足以供玩賞祀祖宗而設之不足以壯觀瞻欲其耀人耳目非雕琢不可而有此玉者巧技未爛終莫可如何也起居忖度夙夜躊躇爰召良工曰寡人有玉不能自治而使秘其光於几席其况能別有寶乎吾子其用利器以刻鏤此玉也吾將使一國之人重吾子玉人仰承聖意俯念奇珍服王之謙感王之誠右斧左斤大展才能曾不幾日而王之玉大治矣王之玉大治庶璞玉無刖足之羞玉人無懷才之歎行見諸大夫國人頌王之善自治又善于不自治而齊且受治而無不治也夫治玉其小者也

廣朋黨論

小人與君子分黨固已至君子與君子分黨禍何可勝言耶二者皆上有以致之夫君子抗懷伊呂與二三知己相切磋志同方道同術羣而已何黨之有及

釋褐登朝展經綸而抒抱負日與公忠體國者討論朝廷之得失探索草野之利弊疆宇日蹙則思有以廣之鄰邦日強則思有以禦之經營肇畫協力同心和而已何黨之有彼小人者飛揚成性妬忌爲懷懼孤立無助也遇姦邪便佞之流深相結納如蚊聚如蟻附迹似忠而實讒慝迹似信而實欺罔泄事精明不得譏其柔懦立言慷慨不得誚其囁嚅羣小互相薦剝布滿闕廷排擠正士端人爲一網打盡之計嗚呼何其險歟使天子明睿豫燭其姦下詔曰今若臣不務明政以補寡人之闕持爵祿阿順苟合且朋比爲姦畔道逆理其屏之遠方終身不齒夫黜邪出自宸衷非因廷臣之彈劾小人雖竄移淪沒無悔也非然者蓄怨積忿恐有決裂之一日矣羣賢在朝和衷共濟庶足固社稷於苞桑而意見稍歧自相攻訐致小人乘閒抵隙發摠宿憤未必皆小人之罪亦半由於自取也然使天子果毅馭下有方黨援門戶之習剗削無遺朝野安謐可翹足待計不出此任其日肆詆謀自潰心腹伊誰之咎降及後世時勢孔艱懷義

憤者毅然決然欲變法自強進而曰方今天下窳敗已極靡有底止律法官制學校農桑政治所出未聞剔除積蠹與民更始也或迺商務不振工藝不興武備日弛國計日絀猶補苴粉飾媮安目前而望軫國步之體消唸吁之厲豈不難哉駁之者曰天方授彼彼之強其暫也君何患焉臣聞弱之能敵強也弱道強淫所謂道法祖宗而守成憲也今蔑古而變於夷庶政紛更無已臣不知其可也嗟嗟舊黨新黨反復辨難不顧國家大計務求議論之伸所賴在上者曠覽時局精於棄取否則聚訟盈廷激而成禍關係豈淺鮮哉

宋均言漢家喜文法廉吏謂其足以止姦今文法廉吏不乏可
稱而姦乃益甚策

謂文吏不足重乎然方略教導禁姦止邪彬彬質有其文雖慘酷斯稱其位矣
謂廉吏不足重乎然世人皆濁彼獨清懲貪墨而儆闖茸太史公稱廉者足以
爲儀表非虛言也文吏重矣而何以姦僞萌起上下相遁耶廉吏重矣而何以

公廉如郅都廉平如趙禹內行修如張湯有清潔之操並有搏擊之能終致人輕犯法盜賊滋起耶方今吏治不飭姦慝益橫欲澄本清源其道將若何吾得而斷之曰文更有才無德廉更有德無才欲止姦而姦終莫能止也文吏所恃者才而一人之才幾何訟魁至黠也豪猾難馴也琴堂多一科條卽草野多一機械各出其才以相難紛紜雜沓莫可究詰始恍然悟曰吾過矣吾過矣吾不敢復矜用法矣廉吏所恃者德琴鶴相偕金錢悉屏巡行追飲馬之風久任表還珠之異因而躊躇滿志自信無慚不虞姦之相乘而起也盛德如有虞而四凶梗化至誠如公旦而二叔流言藐爾清標遂足以化民成俗乎王船山曰文法之吏恃文法以與姦競而固不勝廉吏恃廉以弗懼於姦而姦巧以傷之眞確論也然使文吏奉至尊之休德反衰世之陵夷吾知顓蒙嚮風無煩誥誡兒寬之爲內史也推情與下吏民信愛之龔遂之漑渤海也罷逐捕吏盜賊解散黃霸之守潁川也力行教化而後誅罰姦人去入他郡韓延壽之治馮翊也恩

信周徧人不忍欺若專以鋤姦爲事能如是之服從乎使廉吏勤勞民事務展其才置筭而姦情難隱披籍而姦黨悉知且宜責大指不苟小如汲黯之治民斯可矣今天下玩愒成風文法廉吏已不概見聞有之上無裨於朝廷下無補於閭左甚至四境騷擾爲禍彌深安得有如均者指陳癥結備朝廷之采擇哉

崔亮行停年格論

甲辰縣考三月初六日歲試初覆

封建變而爲郡縣井田易而爲阡陌選舉降而爲科名職官則流而爲資格風會所趨雖聖君賢相亦末如之何也已矣而迂儒不通時務好騁雄談聽之雖足傾心行之實形掣肘停年格者杜僥倖之風抑呌囂之習歷階而升長厚者庶足安其位循序而進奇特者亦得歛其才彼張生十年不得調揚雄之老不遷官何其淹滯也賈誼一歲至大夫公孫數年至宰相又何其迅速也使崔亮司選法必不淹滯若是迅速若是或謂虞廷載采九德最尊周代賓興三物必重秦漢以來專辟召之權者州郡魏晉而後司人物之柄者里門皆考以閭閻

之聲聞試以曹椽之才能純儒雖難猝得古制要未盡失也至亮出而選賢興能之意渺爾無存釐工熙績之端蕩焉悉泯夫官人之難尙矣家庭視其孝友鄉黨察其誠實出入觀其志義憂難取其智謀煩之以事求其理臨之以利察其廉亮乃循資格叙年勞涇渭不分薰蕕莫辨誦裴子野之言得毋滋愧乎嗟嗟爲此說者祇遵舊典未酌時宜是猶鄙郡縣者謂封建之可復譏阡陌者謂井田之可行詬科名者謂選舉之可興也夫北魏之際人品混淆專務擇賢恐好名者誤以爲狷潔之流苛察者誤以爲聰明之子本庸懦也而貌似肫篤本剛愎也而貌似果毅謬授以官上則黼座抱憂下則蒼黎被害關係豈淺鮮耶惟資格之中兼衡量之意斯可矣中材戰兢自守成法得而限之碩彥卓犖不羣成法豈得而拘之如錐處囊其穎立見如劍出匣其鋒足驚最不肖者不畏刺譏之衆難逃考核之科大則誅僂小則貶斥彼謂美惡同登智愚咸進者豈其然哉豈其然哉

治開縣江湖孝義兩會議

甲辰縣考三月十三歲試三覆第五名

今天下頽敝極矣在朝者相軋相傾若冰炭之難合有所謂舊黨新黨焉在野者愈趨愈下若衲鑿之懸殊有所謂江湖孝義焉夫和衷共濟臣道之經也出入相友民情之正也今乃互相攻擊不遺餘力嗚呼異哉迨至激而生變衣冠之倫身赴鼎鑊縉紳之裔血染鋒鋌元氣盡銷伊誰之咎耶若狂妄之徒燒香聚衆不預爲防閑吾恐騷亂閭閻被戮州郡風颺電激靡所底止矣然朝端水火賴執政之彌縫而閭左騷則賴司牧之擘畫豈可聽其蔓延耶開縣近數年來孝義踴江湖而興所以然者江湖之勢盛柔懦罹其害庸愚蒙其欺積而生忿欲有以抵禦之莫若結會一法有事必商有仇必報江湖潛踪歛迹隱忍圖存而一二狡獪陰謀中傷以蜚語聞于官孝義猶不知自斂明目張膽團坐聚談畫地指天發攄宿憤最不肖者結夥劫人於白晝嗚呼孝義之禍起矣猶不自覺耶練丁突至殺掠無忌指良善爲匪徒快雄心于一試蒙曾親觀其事

言之可爲酸鼻江湖遂躊躇滿志鬱而復伸故一邑中有朝江湖而夕孝義者亦有昨孝義而今江湖者民心無常其何以治有謂宜治之以嚴者其說曰薰蕕當辨涇渭宜分除暴方能安良養癰反足貽患江湖孝義令其焚盟帖有隱匿不焚潛擾鄉閭者加以酷刑有謂宜治之以寬者其說曰赤子無知誤入匪類豈忍不教而誅集一邑紳耆授以指意令轉諭顓蒙開導萬端未有不翕然從者斯二者皆竭其流未澄其源也源何在居上者之心而已古之人未有治人而不治己者亦未有治己而不治心者持躬廉潔神明無抱疚之條朝下一令民曰愛我夕下一令民曰撫我江湖孝義不足治也近代如劉清等自治甚嚴民咸向化非明徵耶其或桀驚不馴兩會啓釁尤宜詳加剖析示以大云勿聽吏役之浮說直在江湖則直之直在孝義亦直之聞往歲官吏痛抑孝義不研鞫其始末遇孝義則治之致江湖得計無惑乎物議迭興也若平心聽斷無畸輕畸重之虞民咸述其判語加手于額曰是矣一案平而兩會服非兩會者